

2 CESALONAIKA

1

2

3

CHAPTER 1

O Paula, Silivenusi, kei Timoci, Kivei ra na i soqosoqo lewe ni lotu mai Cesalonaika era sa tu vua na Kalou o Tamada, kei na turaga o Jisu Karisito:

² Me nomudou na nona yalololoma kei na vakacegu ni Kalou o Tamada, kei na Turaga o Jisu Karisito.

³ Keitou sa sega ni cegu ni vakavinavinaka vua na Kalou ena vukumudou, Na veiwekani, ni sa dodonu me vaka kina, ena vuku ni kena tubu cake na nomudou vakabauta, kei na nomudou sa veilomani tiko vaka i kemudou,

⁴ Sa dua na ka na neitou mai dokadoka tiko ena vukumudou, ena loma ni soqosoqo lotu ni Kalou, ena nomudou vosota ka tudei tiko ena vakabauta, ena gauna dou dau vakararawataki kina kei na nomudou vakacacani dou sa dau gumatua ga.

⁵ Ena qai vakaraitaka mai na Kalou na nona vakayacora na lewa dodonu, na nona madigi na Kalou ena dusi kemudou mo dou na taukena na nona matanitu, ena vuku ni nomudou vakararawataki;

⁶ Na Kalou ena nona dodonu, ena sauma vakaidina vei ira era sa vakararawataki kemudou.

⁷ Ena gauna e rairai mai kina na Turaga o Jisu kei ira vata tukuna na nona agilosika kaukauwa, vei kemudou na vakararawataki, dou na vakacegui vata kei keitou.

⁸ Vei ira era sega ni via kila na Kalou ena kani ira na yameyame ni bukawaqa, kei ira era sega ni via rogoca nai tukutuku ni Turaga o Jisu Karisito.

⁹ Era na vakararawataki tiko me sega ni oti rawa, mai vua na Turaga vakaiukuuku sa kaukauwa sara.

¹⁰ Ena siga o ya ena nona lako mai, o ira na yalosavasava era na vakalagilagi Koya, kei ira sa vakabauta era sa qai raici Koya dina, ena vuku ga ni nomudou vakabauta na neitou i tukutuku.

¹¹ O koya oqo keitou sa masulaki kemudou tiko kina vua na Kalou, mo dou yaga ena ka dou sa kacivi kina, ena nomudou cakava ga na ka sa vinaka vua na Kalou, ena vakabauta kei na kaukauwa.

¹² Me rawa ni vakacaucautaki kina na yaca ni noda Turaga o Jisu Karisito ena vukumudou, oi kemudou vei koya, me vaka na loloma ni noda Kalou kei na Turaga o Jisu Karisito.

CHAPTER 2

Vei kemudou na veiwekani; me baleta tiko ga na nona lako mai na noda Turaga o Jisu Karisito kei na noda veisotavi kei koya, keitou kerei kemudou kina,

² Mo dou qarauna na nomudou vakasama me kua ni moici rawarawa, se dua na ka me yavalati kina na yalomudou se dua e vosa vei kemudou se dua e volavola vei kemudou, (me vaka sa mai vei keitou) me vaka ni sa lako mai na siga i Karisito.

³ Me kua ni dua na ka mo dou na vakaisini kina; ni na sega ni yaco na siga o ya, ka vakavo me so e vuki tani mada, ena qai vakaraitaki mai na tamata i valavala ca, na luve ni dauveivakarusai.

⁴ Na dauveisaqasaqa ka vakacerecerei koya vei ira kecega, me vaka sa Kalou ka me qaravi talega, ena dabe tu me vaka sa Kalou ena vale ni Kalou, ka tukuni koya ni o koya na Kalou.

⁵ Dou se nanuma tiko beka ni'u sa tukuna oti tiko vei kemudou na veika oqo se dou sa guilecava tale?

⁶ Oqo dou sa qai kila na ka sa tarova tiko, me qai vakaraitaki ga mai ena kena gauna.

⁷ Na ka vuni ni basu lawa (lewalewa i koya ga) sa cakacaka tiko ena gauna sara ga oqo. O koya ga sa tarova tiko “ me yacova ni sa kau tani yani o koya

⁸ Sa na qai vakaraitaki koya mai na dau basu lawa oqo “ na Turaga ena qai vakamai koya ena i cegu ni gusuna, ka vakarusai koya ena rarama ni Nona lako mai.

⁹ Na lako mai nei koya na daubasu lawa oqo “ sa cakacaka ga i Setani ena kaukauwa, ena i vakatakilakila kei na veika mana lasutaki,

¹⁰ Era na rusa o ira kecega sa vakacalai ka sega ni yalododonu “ ni ra sa sega ni lomana na dina me ra bula kina.

¹¹ Oqo na vuna sa tala kina vei ira na Kalou na veika mana vakailasu “ me ra vakabauta kina na ka e sega ni dina.

¹² Me ra na rusa kece kina o ira sa besetaka na dina, ka marautaka ga na veika e sega ni dodonu.

¹³ Keitou sa vakavinavinaka tikoga oqo vua na Kalou ena vukumudou, oi kemudou na veiwekani sa kune loloma tiko mai vua na Turaga, baleta na Kalou sa digitaki kemudou sara mai na i vakatekivu, mo dou vakabulai ka vakasavasavataki ena nona Yalo Tabu, ni dou sa vakabauta na dina.

¹⁴ Nai tukutuku keitou vunautaka vei kemudou, sa yaco kina na nomudou kacivi kei na kena taukeni na i serau ni noda Turaga o Jisu Karisito.

¹⁵ O koya oqo, na veiwekani, mo dou tudei ka taura matua nai vakavuvuli keitou sa vakatavulica oti, mai na vosa keitou tukuna, se nai tukutuku keitou vola yani.

¹⁶ Sai koya na Turaga o Jisu Karisito kei na Kalou o Tamada, sa lomani keda ka vakaiyautaki keda ena i yau e sega ni ca rawa, ka qai solia vei keda e dua na i nuinui ena nona loloma.

¹⁷ Dou veivakacegui ka veivakadeitaki kemudou vakaikemudou ena vosa kei na cakacaka vinaka kecega.

CHAPTER 3

Ni bera ni'u tinia, dou masulaki keitou tiko mai na veiwekani, me rawa ni vakaleleci vinaka tiko na vosa ni Turaga ka vakarokorokotaki, me vaka na kena yacovi kemudou.

² Me rawa talega ni keitou vakabulai mai vei ira na tamata dau naki ca, ni ra se sega ni lotu taucoko tiko na tamata.

- ³ Ia na Turaga sa yalodina, ena vakataudeitaki kemudou ka maroroi kemudou mai vei ira na tamata dau naki ca.
- ⁴ Na veika keitou vakaroti kemudou kina, keitou sa kila ni keitou vakabauta tiko na Turaga, ni dou na cakava ka dou na cakava vakavinaka sara.
- ⁵ Me tubera na yalomudou na Turaga ki na nona loloma na Kalou, kei na dauvosota i Karisito.
- ⁶ Ia keitou sa vakaroti kemudou tiko na veiwekani, ena yaca ni noda Turaga o Jisu karisito, mo dou lako tani mai vua na wekamudou e sega ni vakalou tu na nona bula, ka sega ni sala vata na neitou i vakavuvuli vei kemudou.
- ⁷ Ni dou sa kila vinaka na sala keitou a muria tiko, ni sega ni dua na i tukuni se i yaloyalo ca keitou boroya vei kemudou;
- ⁸ Ni keitou via kana madrai keitou sa volia ga ka sega ni kana wale, ia keitou sa cakacaka vagumatua tiko ena siga kei na bogi, me kakua kina ni dua na ka keitou vakaocai kemudou tale kina,
- ⁹ E tu vei keitou na kaukauwa me keitou vakatulewa ga yani, ia keitou sega ni via cakava, baleta me rawa ni keitou dusia tiko vei kemudou e dua nai vakarau ni bula mo dou vakadamurimuria.
- ¹⁰ Ni datou a dau tiko vata mai, keitou sa dau veivakaroti tiko ena veika vakaoqo, o ya, kevaka e dua sa sega ni cakacaka, me kua sara ga ni vakani.
- ¹¹ Ni keitou sa mai rogoca eso dou bula vata tiko ekeri, era se cakava tiko ga na bula i valavala ca, levu nodra vucesa, qai vakauasivi sara ni ra madila ena vosa walega, ka ra dau vaka vu ca.
- ¹² O ira sa vakaoqori, keitou sa vakaroti kemudou kina ka vakamamasu ena vuku ni noda Turaga o Jisu Karisito, me ra cakacaka ka kania na kedra madrai.
- ¹³ Ia vei kemudou na veiwekani, dou kakua ni guce ena caka vinaka.
- ¹⁴ Kevaka e dua vei kemudou sa sega ni via muria nai tukutuku oqo, dou wanonovi koya matua ka tawasei koya tani mai na nomudou i soqosoqo, me rawa kina vua me madualaki koya.
- ¹⁵ Mo dou kakua sara ni tabaki koya sobu me vaka e dua na kemudou meca, ia dou tuberi koya ga ka vakavulica ni sa tacimudou dina o koya.
- ¹⁶ Me solia tiko vei kemudou na nona vakacegu, na Kalou ni veivakacegui oqo. Me tiko vata kei kemudou kecega na Turaga.
- ¹⁷ Mo dou qaqa, oi au o Paula, na we ni ligaqu dina dou sa wilika tiko, me vaka ga na vei i vola taucoko au vola, ena dau volai kina na yacaqu me kena i vakadinadina.
- ¹⁸ Na loloma rairai vinaka ni noda Turaga o Jisu Karisito, me sa tiko vata ga kei kemudou ena veivanua kecega. Emeni.

For other languages please go to www.wordproject.org